



Naalagaaffiit Peqatigiit Innarluutilinnut isumaqatigiissutaata atortuulersinneqarneranut aatillugu ussersornermik atuisut, innuttaasullu allat attaveqarniarnerminni ajornartorsiutillit isumaqatigiissummut ilaatinneqartut, nakorsiarneranni malitseqartitsineranut kiisalu nangittumik katsor-sarneqarnerannut atatillugu allakkatigut nassuiaammik tiguisalernissaat pillugu Naalakkersuisut peqquneqarnissaannik Inatsisartuni aalajangiiffisassatut siunnersuut.

(Inatsisartunut ilaasortaq Agathe Fontain, Inuit Ataqtigiit)
(Siullermeenera)

Nuannaarlunga Peqqissutsimut Naalakkersuisup Doris Jakobsenip suliamut uunga atatillugu akissutaa atuarpara. Teknologimi siuariartorneq ulluinnarni inuunitsinni ilaannikkut iluarusutsitsisarpoq ilaannilu qinngarnartarluni. Tamatta assersuutit tamaasa nalugunangilagut.

Teknologip qanoq tusilartunut tutsarluttunullu immikkut iluaqusiisinnaanera pillugu assersuutit allatorneqarput aamma Demokraatini nuannaarutigeqarput KTK - nunami maani tusilartut tutsarluttullu peqatigiiffiat isumaqatigiissuteqarfigineqarsimammat ussersornermik atuisut oqalutseqatalernissaannut. Periutsimi ataqqineqarput inuinnartut inuunerup illersugaanissaanut pisariaqartitsineq aamma paasissutissaatit nakorsamut imaluunniit tarnip nakorsaanut ussersorluni apuunneqartarnissaannut pisariaqartitsineq.

Aamma nuannaarutigearput aamma pigineqalermat oqalunnermi katiterussut, ukiorpassuarni amingaataasimasoq, suliaq taanna 2012-mi aallartinneqarsimavoq. Suliniutit matumani aallartikkusutat, aallartinneqareerput aamma peqqinnissaqarfimmi inunnik ussorneq atorlugu attaveqarsinnaasunik atorfinitsitsisoqarnissaa Naalakkersuisut periarfissarsiuunniarpaat.

Tamanna tunngavigalugu siunnersuutip itigartinneqarnissaa inassutigearput, siunertaq pivisunngortinneqareermat.